



Kepesatan dunia digital, media sosial lunturkan minat anak muda membaca - Anwar

Oleh Mohd Nasaruddin Parzi - Mei 27, 2023 @ 5:42pm
bhnews@bh.com.my

KUALA LUMPUR: Kepesatan dunia digital khususnya media sosial, sedikit sebanyak sudah melunturkan minat masyarakat khususnya anak muda dalam menjadikan amalan membaca sebagai satu budaya penting, kata Datuk Seri Anwar Ibrahim.

Perdana Menteri, berkata membaca wajar dijadikan satu budaya ilmu yang menjadi terapan buat seluruh rakyat khususnya anak muda dalam mengangkat nilai dan akhlak sebuah bangsa, kata Datuk Seri Anwar Ibrahim.

"Anak muda hendaklah menjadikan budaya membaca ini sebagai satu amalan bukan saja untuk mencari ilmu, tetapi perbaiki sahsiah diri.

"Malaysia dan (kerajaan) Malaysia Madani ini tidak mungkin terangkat tanpa akhlak dan nilai serta kesediaan anak-anak muda untuk membudayakan ilmu dengan pembacaan yang meluas.

"Sementara ada media sosial.. ok saya tak pertikai kewujudannya, tapi percayalah bahawa manusia yang ada akhlak dan ilmu mesti dia mula dengan tradisi membaca secara serius.

"Kalau mahu angkat martabat negara ini caranya bagaimana? membaca," katanya berucap merasmikan Pesta Buku Antarabangsa Kuala Lumpur (PBAKL) kali ke-40 di Pusat Dagangan Dunia (WTC) di sini, hari ini.

Turut hadir, Menteri Pendidikan, Fadhlina Sidek.

PBAKL tahun ini mendapat sambutan yang menggalakkan dengan penyertaan 211 syarikat dan penerbit dari dalam dan luar negara membabitkan 812 reruai.

Paling memberangsangkan pesta buku kali ini turut menyasarkan kehadiran satu juta pengunjung yang berlangsung bermula semalam sehingga 4 Jun ini.

Mengulas lanjut, Anwar berkata, anak muda perlu didedah dengan ilmu membaca bagi mengelakkan mereka tidak mudah terikut dengan dakyah pihak yang suka menabur budaya kebencian dalam kalangan rakyat berbilang kaum.

"Justeru, jangan ambil ringan. Ini bukan pesta biasa, ucapan saya hari ini adalah ucapan merayu pemikiran anak muda, ubahlah dan mulakan budaya baru iaitu budaya membaca bersungguh-sungguh.

"Walaupun saudara tahu bila kita berikan bantuan e-Wallet dan dana buku kepada mahasiswa, itu juga menggalakkan membaca dan menghidupkan penerbitan buku dalam pelbagai bahasa. Bahasa Melayu, Cina, Tamil, Arab dan Perancis.

"Saya mahu pesan, mulakan satu tradisi baik dikalangan anak muda. Mesti tanam semangat dan minat untuk membaca serta menilai orang selain dari akhlak dan ilmu adalah dengan minatnya untuk membaca," katanya.